

**Ադրբեջանի՝ աշխարհաքաղաքական ճնշման կիզակետում.
սրացման դինամիկան և ռազմավարական ընտրությունը
ԱՌՎԱԿ կենտրոնի մեկնաբանությունը, 11.08.2025 թ.¹**

Սեղմագիր

ԱՌՎԱԿ-ը վերլուծում է տարածաշրջանային և համաշխարհային առանցքային դերակատարների կողմից Ադրբեջանի վրա ճնշման սաստկացումը: Նշվում է, որ Բաքվի նախկինում հաջողված փոխլրացման քաղաքականությունը անկենսունակ է դառնում խորացող գլոբալ բևեռացման պայմաններում:

Դիտարկվում է ճնշման բազմավեկտոր բնույթը. Մոսկվան, օգտագործելով միգրացիոն և սփյուռքի քաղաքականության լծակները, ինչպես նաև տնտեսական պատժամիջոցները, ձգտում է Բաքվին պարտադրել ընտրություն կատարել հոգուր «Հյուսիս–Հարավ» նախագծի: Միևնույն ժամանակ Արևմուտքը կիրառում է ֆինանսատնտեսական միջոցներ՝ հարվածներ հասցնելով Բաքվի համար ամենազգայուն ոլորտին՝ նավթի արտահանմանը: Այս գործողությունները մեկնաբանվում են որպես արձագանք Ռուսաստանի հետ բացահայտ առճակատումից խուսափելու Բաքվի փորձերին:

Վերլուծվում է այն երկրներն, որ ծառացել է Ի. Ալիևի առջև, ով ստիպված է ընտրություն կատարել ՌԴ-ի և ԻԻՀ-ի հետ համագործակցության և արևմտյան նախաձեռնությունների համար ռազմավարական մարտահենադաշտի (պլացդարմի) դերի միջև:

Վերջում եզրակացվում է, որ Բաքուն, գիտակցելով ռիսկերը, քայլեր է ձեռնարկում «թունավոր» գործընկերներից իր կախվածությունը նվազագույնի հասցնելու համար, ինչը կարող է վկայել նրա՝ արտաքին քաղաքական դոկտրինի հիմնարար վերանայմանը նախապատրաստվելու մասին:

Բանալի բառեր. Ադրբեջան, աշխարհաքաղաքական ճնշում, Ռուսաստան, Արևմուտք, Իրան, Հյուսիս–Հարավ, փոխլրացման քաղաքականություն, պատժամիջոցներ, Սփյուռք, նավթային արտահանում:

1. Բաքվի «փոխլրացման քաղաքականության» դարաշրջանի ավարտը

Մի շարք իրադարձություններ, որոնց կենտրոնում վերջին ամիսներին հայտնվել է Ադրբեջանը, վկայում են, որ Բաքվի վրա մեծանում է տարածաշրջանային և համաշխարհային ուժային կենտրոնների ճնշումը: Ակնհայտ է, որ համակողմանի ճնշման միտումը կպահպանվի այնքան ժամանակ, քանի դեռ Ի. Ալիևը, սպառնալից խուսափելու վերջին ռեսուրսները, չկողմնորոշվի զարգացման վերջնական վեկտորի հարցում: Բաքուն կանգնած է ընտրության առջև. կամ աջակցել Մոսկվայի և Թեհրանի նախաձեռնությանը՝ ստեղծել «Հյուսիս–Հարավ» լոգիստիկ մեգանախագիծ, որի գլխավոր նպատակը, բացի առևտրաէներգետիկ նշանակությունից, Կենտրոնական Ասիայի ուղղությամբ ազդեցության ծավալման արգելափակումն է, կամ թույլ տալ, որ իր երկիրը ռուս-իրանական դաշնակցային

¹ Նյութի բնօրինակը (ռուս.) հրապարակվել է մեր կայքէջում 05.08.2025 թ.:

փոխգործակցության կանխարգելիչի դեր խաղա ու դառնա ռազմավարական մարտահենադաշտ դեպի մայրցամաքի կենտրոն այնպիսի արևմտյան նախաձեռնությունների արտահանման համար, ինչպիսիք են «թյուրքական ՆԱՏՕ»-ն, «Աբրահամյան համաձայնագրերը», «Կայուն զարգացման նպատակները» (ԿՁՆ)² և այլն, որոնք ուղղված են «Գլոբալ Հարավի» և նրա ինտեգրման նախագծերի կազմալուծմանը, ինչպիսին է Շանհայի համագործակցության կազմակերպությունը (ՇՀԿ):

Բաքուն ստիպված պիտի լինի վերջնական ընտրություն կատարել, քանի որ տարածաշրջանում և աշխարհում իրադարձությունները դինամիկ զարգանում են պայմանական «Հյուսիսի» և «Հարավի» բևեռացման տրամաբանությամբ: Աշխարհաքաղաքական խզվածքի գծում առանցքային դիրք ունեցող Ադրբեջանը հետզհետե ավելի քիչ հնարավորություններ ունի շարունակելու բազմազանեցնելու իր արտաքին քաղաքականությունը: Մինչև վերջերս Բաքուն իրեն զգում էր աշխարհաքաղաքական հարմարավետության գոտում՝ օգտվելով ի շահ տարածաշրջանային և համաշխարհային գրեթե բոլոր դերակատարներին էներգետիկ և լոգիստիկ ծառայություններ մատուցելու հնարավորությունից: Սակայն աշխարհում աշխարհաքաղաքական շահերի տարբերակումը, որը սուր դրսևորվեց ռուս-ուկրաինական և իրանա-իսրայելական պատերազմներից հետո, որոշ չափով Ադրբեջանի աշխարհագրական և արտահանման-հումքային առավելությունները վերածեց թերությունների՝ խթանելով անվտանգության պակասը ինչպես հանրապետության, այնպես էլ դրա իշխող ռեժիմի համար:

Բաքվի՝ էներգապաշարների և լոգիստիկ ներուժի հաջող օգտագործման հետևանք հանդիսացող խուսափարման փոխլրացման քաղաքականության արդյունավետության մասին է վկայում տարածաշրջանային դերակատարների և ուժի համաշխարհային կենտրոնների փոխհամաձայնությունը Ղարաբաղյան խնդրի ռազմական լուծման շուրջ: Ի. Ալիևին հաջողվեց համոզել հիմնական աշխարհաքաղաքական խաղացողներին, որ անհրաժեշտ է վերացնել Ղարաբաղյան գործոնը՝ ի շահ էներգետիկ համագործակցության և տարածաշրջանում գլոբալ առևտրային երթուղիների անվտանգության, որոնց հետ շահագրգիռ կողմերից յուրաքանչյուրը (ԱՄՆ, ԵՄ, Թուրքիա, Ռուսաստան, Իրան) կապում էր սեփական աշխարհաքաղաքական ծրագրերի հեռանկարները: Սակայն հետագայում հենց «ղարաբաղյան զիջումն» առանցքային առիթ դարձավ բոլոր կողմերի համար Բաքվից

² «Եվրոպական Միության կողմից ֆինանսավորվող Կենտրոնական Ասիայի ԿՁՆ հարթակ. Ղեկավար կոմիտեի եզրափակիչ նիստ»: INDR (ռուս.), 25.06.2024, <https://www.undp.org/ru/kazakhstan/press-releases/platforma-cur-dlya-centralnoy-azii-finansiruemaya-evropeyskim-soyuzom-zaklyuchitelnoe-zasedanie-rukovodyashego-komiteta> (բեռնման օրը՝ 02.08.2025):

հստակություն պահանջելու այն պայմաններում, երբ տարածաշրջանի դերակատարների շահերը սկսեցին արմատապես տարանջատվել:

Ի. Ալիևին բոլոր կողմերից պահանջներ են ներկայացնում *«հաշիվները վճարելու»* ինչպես դարաբաղյան *«թողություն»*, այնպես էլ նրա ամբողջատիրական վարչակարգի նկատմամբ հանդուրժողական վերաբերմունքի համար, վարչախումբ, որի պահվածքը վերջին տասնամյակների ընթացքում ակնհայտորեն հեռու էր ժողովրդավարության հռչակված չափանիշներից: Ալիևն, ըստ էության, հավաքական «վարկ» է ստացել Ադրբեջանում ամբողջատիրության և Արցախի հայաթափման համար համաշխարհային և տարածաշրջանային ուժային կենտրոններից, բայց բոլորի հետ իր համաժամանակյա հավատարմությամբ հատուցել չի կարող, քանի որ *«վարկատուներն»* այժմ բովանդակությամբ տրամագծորեն հակառակ ծրագրեր են կապում Բաքվի հետ: Ուստի տպավորություն է ստեղծվում, որ *«վարկատուները»* առաջանցիկ են գործում՝ ձգտելով Բաքվից ստանալ իրենց հասանելիքը:

2. Մոսկվայի մարտավարությունը. ֆինանսա-միգրացիոն ճնշում

Այս համատեքստում պետք է հատուկ ուշադրություն դարձնել այն հանգամանքին, որ Ռուսաստանի Եկատերինբուրգ քաղաքում ադրբեջանական սփյուռքի ներկայացուցիչների ձերբակալությունների պատմությունը սկիզբ է առել Թել Ավիվի և Թեհրանի միջև, այսպես կոչված, *«12-օրյա պատերազմում»* հրադադարի ձեռքբերումից ընդամենը 2 օր անց: Ակնհայտ է, որ տեխնիկական հսկողության և հետախուզության միջոցով Մոսկվան արձանագրել է այն փաստը, որ ԱդրՀ տարածքն ու ռազմական ենթակառուցվածքներն ակտիվորեն գործի են դրվել Իսրայելի և ԱՄՆ-ի կողմից Իրանին հարվածելու համար: Ռուսաստանի համար դա ազդանշան էր ուժեղ քաղաքական և ֆինանսական ճնշում գործադրելու Բաքվի վրա, որը ներգրավված էր ձևավորվող Մոսկվա-Թեհրան առանցքի ոչնչացման նախագծում: Դրանով իսկ ՌԴ-ն նախազգուշացրել է ԱդրՀ-ին, որ չի ողջունում Բաքվի փաստացի շեղումը իսրայելա-իրանական հակամարտությունում հայտարարված չեզոքությունից և կասկածում է նրան՝ հակաիրանական արշավի սպասվող հաջորդ փուլին ավելի խորը և բովանդակալից կերպով ընդգրկվելու մտադրության մեջ:

Մոսկվայի հաղորդագրություններին Բաքվի բուռն արձագանքը Կրեմլին ստիպեց ընդլայնել ադրբեջանական սփյուռքի հանցավոր գործունեության աուդիտի աշխարհագրությունը և ձեռնամուխ լինել ՌԴ-ում տասնամյակների ընթացքում ստեղծված էթնիկ ադրբեջանական միրգ-բանջարեղենային սինդիկատի վերացմանը, որը Ռուսաստանից Ադրբեջանում ապրող ֆիզիկական անձանց կայուն փոխանցումների հիմնական աղբյուրն է: Մոսկվան նաև խստացրել է իր տարածքում Ադրբեջանից

ներգադրյալների գտնվելու պահանջները, ինչպես նաև, ըստ ներքին աղբյուրների տեղեկությունների, պատրաստվում է աուդիտի ենթարկել մերձկասպյան հանրապետությունից եկածների խոշոր բիզնեսները, որոնք Ռուսաստանից Ադրբեջան և մի շարք արևմտյան երկրներ «սև փողերի» դուրսբերման սխեմաներ են մշակել:

Դրա հետ մեկտեղ, Կրեմլը և ՌԴ ԱԳՆ-ն չափազանց զգույշ են հարաբերությունների ներկայիս սրացման վերաբերյալ իրենց քաղաքական գնահատականներում՝ քաղաքական և դիվանագիտական խուսափարման և լարվածության լիցքաթափման դաշտ թողնելով իրենց և Իլհամ Ալիևի համար: Մոսկվայի մարտավարությունն ակնհայտ է. ֆինանսական և միգրացիոն ճնշումների միջոցով նախադրյալներ ստեղծել Ադրբեջանում սոցիալական ճգնաժամի և Ռուսաստանի նկատմամբ քաղաքական վերնախավի պահվածքից լայն զանգվածների շրջանում դժգոհություն հարուցելու համար: Եվ միևնույն ժամանակ՝ թույլ չտալ այնպիսի իրավիճակի ձևավորում, որի դեպքում Ի. Ալիևն՝ իր արևմտյան գործընկերների ճնշման ներքո, ստիպված կլինի բաց առճակատման փուլ հայտարարել հյուսիսային հարևանի հետ:

Իրադարձությունների ընթացքի մշտադիտարկումը թույլ է տալիս եզրակացնել, որ Մոսկվան, ստեղծելով բարդություններ, միևնույն ժամանակ «փրկօղակ» է նետում Ի. Ալիևին: Դա նրան հնարավորություն է տալիս խուսափարել և արդարացնել իր հրաժարումը հակաիրանական ու, հնարավոր է, ապագայում հակառուսական արշավներին ներգրավվելուց՝ որպես պատճառաբանություն բերելով հենց Ադրբեջանի ներսում ստեղծված սոցիալ-քաղաքական բարդ իրավիճակը:

3. Արևմուտքի ճնշումները. տնտեսական և վարկանիշային հարվածներ

Ակնհայտ կերպով ռուսական մարտավարությունը որոշակի հաջողություն ունեցավ՝ նպաստելով Բաքվում արմատական հոետորաբանության նկատելի անկմանը և այնպիսի բանաձևի առաջադրմանը, որը թույլ կտա «փոքր արյան գնով» կանխել հարաբերությունների արժեզրկման գործընթացը: Այս առումով հատկանշական է գերմանական *Berliner Zeitung* պարբերականին 26.06.2025 թ. Ի. Ալիևի արտաքին քաղաքական հարցերով օգնական Հիքմեթ Հաջիևի տված հարցազրույցում արված հայտարարությունը: Հ. Հաջիևը փաստացի հասկացրել է, որ միայն Ռուսաստանի կողմից 2024 թ. դեկտեմբերի 25-ին ադրբեջանական AZAL ավիաընկերության ինքնաթիռի սխալմամբ խոցման փաստի ճանաչումը և միջազգային իրավունքով նախատեսված պատասխանատվության համար ֆինանսական փոխհատուցման վճարումը բավարար կլինեն Բաքվի և Մոսկվայի միջև «բարեկամական» հարաբերությունների լիարժեք

վերականգնման համար³: Հատկանշական է, որ Հաջինն այս համատեքստում չի հիշատակել ո՛չ Եկատերինբուրգում տեղի ունեցած իրադարձությունները, ո՛չ էլ դրան հաջորդած ՌԴ ողջ տարածքում իրավապահ մարմինների կոշտ միջոցառումներն ադրբեջանական սփյուռքի կառույցների և ադրբեջանցի ներգաղթյալների նկատմամբ:

Փաստորեն, Ադրբեջանի նախագահի անմիջական շրջապատին պատկանող այդ բարձրաստիճան պաշտոնյայի հայտարարությունը վկայում է, որ Բաքուն գնահատել է ինչպես Մոսկվայի հետ հարաբերություններում ճգնաժամի շարունակման հնարավոր ֆինանսատնտեսական ծախսերը, այնպես էլ՝ Կրեմլի կողմից հարաբերությունների նախկին մակարդակին վերադառնալու հնարավորությունը: Ռուսաստանի կողմից քաղաքացիական ինքնաթիռի կործանման պատասխանատվության ընդունումը նվազագույն պայմանն է, որն այժմ պաշտոնական Բաքուն առաջ է քաշել Մոսկվայի առջև՝ «դեմքը փրկելու համար»: Այս առումով եզրակացությունն ինքնին հուշում է, որ Ի. Ալիևը նահանջել է ռուսական միջոցների ճնշման ներքո և ձգտում է Արևմուտքին ցույց տալ նման որոշման օբյեկտիվ այլընտրանքի բացակայությունը:

Հավանաբար, հենց Ի. Ալիևի այս որոշումը, որը փաստացի նշանակում էր Մոսկվայի հետ հակամարտությունը չարելը, դարձավ պատճառ, որ Արևմուտքը հանկարծակիորեն նոր պահանջներ ներկայացրեց Բաքվին էներգետիկ համագործակցության ոլորտում և հայտարարեց առևտրատնտեսական պատժամիջոցների մասին:

26.07.2025 թ. հայտնի դարձավ, որ ԵՄ-ը պատժամիջոցներ է սահմանել 105 նավթատար լցանավերի դեմ: Այդ թվում էին «Շուշա» և «Ղարաբաղ» նավերը, որոնց սեփականատեր ընկերությունները (SA Susha Shipholdings և SA Karabakh Shipholdings) գրանցված են Բաքվում⁴: Այս լցանավերը վերջին տարիներին անընդհատ նավարկել են ռուսաստանյան Պրիմորսկի և թուրքական Նեմրուդ նավահանգիստների միջև՝ ռուսական հում նավթը հասցնելով Միջերկրական ծով: Հնարավոր է, որ երկու ադրբեջանական լցանավերի ընդգրկումը պատժամիջոցների ընդարձակ ցուցակում չպետք է աղմկահարույց համարվեր: Սակայն, եթե հաշվի առնենք, որ Արևմուտքը մինչև վերջերս Բաքվի հետ ավանդաբար նրբանկատ է եղել ռուս-ադրբեջանական նավթային վերաարտահանման հարցում և փորձել է աչք փակել SOCAR-ի հետ փոխկապակցված ադրբեջանական

³ «Հաջին. Ադրբեջանը Ռուսաստանին կոչ է անում պատասխանատվություն ստանձնել խոցված ԱԶԱԼ ինքնաթիռի գործով»: Report.az (ռու.) 26.07.2025, <https://report.az/ru/vneshnyaya-politika/gadzhiev-azerbajdzhan-prizyvaet-rossiyu-vzyat-otvetstvennost-v-dele-o-sbitom-samolete-azal/> (բեռնման օրը՝ 02.08.2025):

⁴ «Եվրամիությունը պատժամիջոցներ է սահմանել ադրբեջանական «Ղարաբաղ» և «Շուշա» լցանավերի դեմ: «Хроника Кавказа» (ռու.), 26.07.2025, <https://caucasus-chronicle.com/2025/07/26/4268/> (բեռնման օրը՝ 03.08.2025):

տրանսպորտային ընկերություններին բարձր եկամուտներ բերող «գորշ սխեմաների» վրա, ապա ներկայիս որոշումն առնվազն կարելի է անսպասելի համարել: Հատկապես հաշվի առնելով այն հանգամանքը, որ պատժամիջոցների ցանկում ներառվել է ոչ ամբողջ, այսպես կոչված, «միջազգային ստանդարտային նավատորմը», որն աշխատում է Ռուսաստանի համար: Հաշվի առնելով Բրյուսելի հետ Բաքվի «առանձնահատուկ հարաբերությունները»՝ «Շուշա» և «Ղարաբաղ» լցանավերն այս անգամ էլ կարող էին պատժամիջոցների ցուցակից դուրս հայտնվել, բայց ԵՄ-ը, ակնհայտորեն առաջնորդվելով ինչ-որ նոր հանգամանքներով, նպատակահարմար գտավ խնդիրներ ստեղծել Ադրբեյջանի համար:

Եվրոպական շուկայում Բաքվի համար ֆինանսական ու վարկանիշային մյուս և առավել շոշափելի կորուստը ադրբեյջանական աղտոտված նավթի մեծ խմբաքանակների հետ կապված միջադեպն էր: Ինչպես վկայում է *Bloomberg* պարբերականը, «պատժամիջոցների լցանավային ցուցակի» մասին տեղեկատվության հրապարակումից ընդամենը մեկ օր առաջ հայտնի դարձավ, որ բրիտանական *British Petroleum* և իտալական *Eni* ընկերություններն Ադրբեյջանին մեղադրել են Բաքու-Թբիլիսի-Ջեյհան նավթամուղով օրգանական քլորիդներով աղտոտված մեծ քանակությամբ նավթ մղելու մեջ⁵: *Reuters* գործակալության տեղեկություններով՝ մեկ օր անց Բաքվին նմանատիպ մեղադրանք է ներկայացրել ավստրիական *OMV* ընկերությունը, որը նույնպես ադրբեյջանական հում նավթ է գնում⁶: Որպես կանոն, օրգանական քլորիդներն օգտագործվում են շահութաբերությունը կորցնող նավթահորերից արդյունահանման ծավալները մեծացնելու համար: Այնուամենայնիվ, վերամշակման գործարանի սարքավորումները շատ արագ շարքից դուրս են գալիս այս քիմիական նյութերից: Այդ առումով, գնորդ երկրների ոլորտային մարմինները հետաքննություն են նախաձեռնել տվյալ հարցի շուրջ, և արդեն տեղեկություններ են հայտնվել առ այն, որ Բաքուն առնվազն բախվել է իր աղտոտված նավթի արդեն իսկ արտահանված խմբաքանակների գների անկմանը:

Տվյալ վերլուծության համար ոչ այնքան կարևոր են քլորիդներով նավթի աղտոտման տեխնիկական ասպեկտները, որքան որ Բաքվի վրա Արևմուտքի քաղաքական ճնշման աճի հետ միջադեպի համաժամանակությունը: Հատուկ ուշադրություն է գրավում այն փաստը, որ բողոքի ակցիան նախաձեռնվել է այնպիսի ընկերությունների կողմից, ինչպիսիք են *BP*-ն և *Eni*-ն, որոնք ավանդաբար հայտնի են Մեծ Բրիտանիայում, Իտալիայում և, ընդհանուր

⁵ «Երկու ընկերություններ Ադրբեյջանին մեղադրել են աղտոտված նավթ մատակարարելու մեջ»: РБК (ռու.), 24.07.2025, <https://gorod-kimry.ru/press/one/?id=3365930> (բեռնման օրը՝ 03.08.2025):

⁶ «Ավստրիական OMV-ն նույնպես քլորիդ է գտել ադրբեյջանական նավթի մեջ»: Նավթագազային ծառայության ազգային ասոցիացիա (ռու.), 28.07.2025, <https://nangs.org/news/markets/oil/tsena-nefti-brent-na-ice-prevysila- usd70-za-barrel-vpervye-s-18-iyulya> (բեռնման օրը՝ 03.08.2025):

առմամբ, Եվրոպայում ադրբեջանական ֆինանսատնտեսական և քաղաքական շահերին աջակցելու համար:

Այս առումով հարկ է ուշադրություն դարձնել ևս մեկ ուշագրավ փաստի: Բանն այն է, որ իտալական նավթային *Eni* կոնցեռնի բողոքն այսպես թե այնպես արձագանքում է Բաքվի որոշմանը՝ հրաժարվել Եվրոպայի խոշորագույն իտալական Տարանտոյում գտնվող պողպատաձուլական ADI-ի գործարանի՝ արդեն իսկ համաձայնեցված գնումից: 22.07.2025 թ. Ի. Ալիևը, Մինգեչաուրում ընդունելով Իտալիայի ձեռներեցության և արդյունաբերության նախարար Ադոլֆո Ուրսոյին, հայտարարել է, որ Բաքուն չի ցանկանում ներդրումներ կատարել այդ ձեռնարկությունում՝ իբր Ապուլիայի իշխանությունների կողմից բյուրոկրատական և իրավական արգելքների դիմակայելու մտավախությունների, ինչպես նաև Իտալիայի այդ տարածաշրջանում ավանդաբար ակտիվ բնապահպանական ակտիվիստների հակազդեցության պատճառով⁷:

Դեռևս 2025 թ. մարտին ադրբեջանական *Baku Steel Company* մետաղագործական ընկերությունը կառավարության աջակցությամբ մտադիր էր գնել Տարանտոյի գործարանի բաժնետոմսերը և դրա վերագործարկման մեջ ներդնել մոտ 2 մլրդ եվրո: Այդ իրավունքի համար պայքարում Ադրբեջանը նույնիսկ մրցույթից դուրս մղեց հնդկական պողպատաձուլական հսկա *Jindal Steel*-ին՝ ակնհայտորեն ավելի գրավիչ ներդրումային փաթեթ առաջարկելով իտալական կողմին: Սակայն այս ամենին հաջորդեց ձեռք բերված պայմանավորվածություններից հանկարծակի հրաժարումը, ինչը չէր կարող գրգռվածություն չառաջացնել իտալական կողմի մոտ: Դրանով իսկ օրգանական քլորիդների հետ կապված հրապարակային աղմուկը, որի նախաձեռնողներից մեկը Իտալիան էր, հնարավոր է, ինչպես Հոռմ-Բաքու հարաբերությունների բարդացման, այնպես էլ Վ. Պուտինի հետ ուղիղ բախումից խուսափելու՝ Ի. Ալիևի փորձերի հետևանքով Ադրբեջանի վրա Արևմուտքի ճնշման ավելի լայն համատեքստի արդյունք է:

Եվրոպայի և Ադրբեջանի միջև առևտրաէներգետիկական փոխգործակցության բարդացման մասին վկայող փաստերի համալիրը լրացվում է նաև այն լուրով, որ Բաքուն պատրաստվում է վաճառել Էգեյան ծովում նավթի և նավթամթերքների փոխադրման իր տերմինալը⁸: Այս նավահանգստային տերմինալը, որի սեփականատերն է Ադրբեջանի պետական նավթագազային *SOCAR* ընկերության *Turkiye Energy AS (STEAS)* դուստր

⁷ «Բացահայտվել են Իլիամ Ալիևի և իտալացի նախարարի հանդիպման մանրամասները. Ադրբեջանը հրաժարվում է գնել Տարանտոյի մետաղագործական գործարանը»: Haqqin.az (ռուս.), 22.07.2025, <https://haqqin.az/news/354708> (բեռնման օրը՝ 03.08.2025):

⁸ «SOCAR-ը վաճառում է Էգեյան ծովի իր տերմինալը»: Haqqin.az (ռուս.), 25.07.2025, <https://haqqin.az/news/354941> (բեռնման օրը՝ 03.08.2025):

ձեռնարկությունը, նույնպես առանցքային օղակ է դեպի Եվրոպա ադրբեջանական նավթի մատակարարման լոգիստիկայի մեջ: Հազիվ թե զուտ զուգադիպություն լինի այն հանգամանքը, որ այս տերմինալի վաճառքի մասին լուրը հայտնվել է 25.07.2025 թ., այսինքն՝ օրգանական քլորիդների հետ կապված աղմուկի ամենաթեժ պահին: Ադրբեջանական ԶԼՄ-ների վկայությամբ, Էգեյան ծովում գտնվող տերմինալը SOCAR-ի՝ Ադրբեջանից դուրս գտնվող միակ ակտիվը չէ, որից Բաքուն ցանկանում է ազատվել: Արտասահմանյան այլ օբյեկտների վաճառքի վերաբերյալ տեղեկատվության բաց հասանելիություն դեռևս չկա, սակայն կարելի է ենթադրել, որ խոսքը կարող է վերաբերել Ադրբեջան-Եվրոպա առևտրաէներգետիկական փոխգործակցության հոլովությունում աշխատող ակտիվներին: Հետաքրքիր է, որ տերմինալի վաճառքի մասին լուրից գրեթե 10 օր անց ադրբեջանական ԶԼՄ-ները հանդես են եկել սեփական տեղեկատվության հերքմամբ՝ դրանով իսկ միայն ուժեղացնելով ինտրիգը⁹:

4. Հետևություններ. ռազմավարական երկրնորանք և հարմարվողականության փորձեր

Այսպիսով, վերը նշված տեղեկությունների համադրումն ու վերլուծությունը թույլ են տալիս եզրակացնել, որ հավաքական Արևմուտքը և, մասնավորապես, նրա եվրոպական բաղադրիչը Բաքվի վրա ֆինանսատնտեսական ճնշման նշաններ են ցույց տալիս: Եթե Մոսկվան ձգտում է Ի. Ալիևին ցույց տալ տրանսֆերտային փոխանցումները խոչընդոտելու, ռուսաստանյան աշխատաշուկա ադրբեջանցիների մուտքը փակելու և ադրբեջանական գյուղմթերքի ներկրումը դադարեցնելու իր հնարավորությունները, ապա արևմտյան գործընկերները նախազգուշական հարված են հասցնում Ադրբեջանի եկամուտների ամենաէական աղբյուրի՝ նավթի արտահանմանը: Մոսկվան ցույց է տալիս Ադրբեջանում լայն զանգվածների անհատական բյուջեները թիրախավորելու իր կարողությունը, մինչդեռ արևմտյան գործընկերները նշանառության տակ են վերցնում հենց հանրապետության պետբյուջեն: Սակայն, երկու դեպքում էլ հետևանքներն Ադրբեջանի իշխանական վերնախավին կարող են սպառնալ սոցիալական խռովություններով և ներքաղաքական ապակայունացմամբ:

Ակնհայտ է, որ Բաքուն հայտնվել է չափազանց բարդ իրավիճակում, և միջազգային օրակարգի ամենացավոտ կետերի (Ուկրաինա, Մերձավոր Արևելք) շուրջ աճող լարվածության դինամիկայի պահպանման դեպքում, որոնք որոշում են աշխարհում ապագա

⁹ «SOCAR-ը չի պատրաստվում վաճառել իր կոնտեյներային նավահանգիստը Թուրքիայում, ընդհակառակը...»: Haqqin.az (ռուս.), 04.08.2025, <https://haqqin.az/news/355949> (բեռնման օրը՝ 04.08.2025):

անվտանգային ճարտարապետության ճակատագիրը, նա ստիպված կլինի զոհաբերել արտաքին քաղաքականության բազմակետորության հայեցակարգը: Ադրբեջանական իշխանությունների առջև կանգնած է ոչ թե շահեկան ճանապարհի որոնելու երկընտրանքը, այլ չարյաց փոքրագույնը ընտրելու անհրաժեշտությունը: Սա բավականին ծանր խնդիր է, քանի որ պահանջում է ճշգրիտ հաշվարկել, թե հակամարտող ճամբարներից յուրաքանչյուրը որքանով է պատրաստ ընդարձակել Ուկրաինայի և Իրանի շուրջ առճակատումն ու վա-բանկ գնալ:

Իսկ առայժմ, մինչև ճնշման կրիտիկական կետին հասնելը, Ի. Ալիևը փորձում է ազատվել տարածաշրջանային և գլոբալ դերակատարների շահերի բազմաբարդ «սարդոստրայինից», որոնցով նա անձամբ նպաստել է իր հանրապետությունը խճճելուն: Հնարավոր է, որ հենց այդ պատճառով է Բաքուն վաճառում արտաքին ակտիվները, հրաժարվում ներդրումային պարտավորություններից, ֆինանսական միջոցների աուդիտ կատարում և վերանայում ծախսերի նախագծերը՝ փորձելով հնարավորինս նվազեցնել կախվածությունը «թունոտ» դարձած գործընկերներից և հնարավորինս նվազագույնի հասցնել երկրում հասունացող ապակայունացնող ցնցումների ուժը: